

MARET POST

- eit trufast arbeidsmenneske

Av Helge Husby



«I henhold til Deres søknad tillater jeg meg herved å meddele Dem avskjed som landpostbud i landpostrute nr. 5635 Gyl -Torjulvågen fra 1. mars 1969.

Jeg vil på denne måte få lov til å takke Dem for Deres utmerkede tjeneste som landpostbud i nærmere 50 år.»

Dette brevet var underskreve postmesteren i Kristiansund og var ikkje meir enn nokre maskinskrevne ord på eit brev-kort i A6-format.

Dette var orda Marit Bergem fekk med seg etter bortimot 50 års trufast teneste som postomberar mellom Bergem, Gyl og Tylvågen - til alle årstider – i alt slags vêt og føre.

Historia om Maret Post står i sterk kontrast til dagens norske samfunn, der folk syter og ber seg og går til streik kvar vår for å få meir pengar enn naboen. Ho utførte ei stor teneste til beste for innbyggjarane i Gyl og Tylvågen kretsar. Når eg har nemnt at eg ville skrive om ho Maret Post, har eg fått mange godord frå bygdafolk.

Eg må nemne at Maret Post var ikkje åleine som postomberar i Tingvoll. Det var fleire, og Marit Bergem hadde fleire kvinnekollegaer i dette yrket.